

大毘婆沙論

牙五

三百七十三  
側五

50447

Handwritten mark or signature in the top right corner.



Small handwritten mark or signature in the bottom left corner.

Small handwritten mark or signature in the bottom center.

Small handwritten mark or signature in the bottom right corner.

阿毗達磨大毗婆沙論卷第五

五百大阿羅漢等造

三藏法師

玄奘奉

詔譯

雜蘊第一中世第一法納息第一之四

世第一法當言一心多心耶乃至廣說問何  
故作此論答雖已說彼相應差別而未顯示  
現前多少今欲顯示惟一刹那故作斯論復  
次為欲遮遣他宗義故如分別論者執世第  
一法相續現前彼說相續揔有三種一時相  
續二生相續三相似相續世第一法雖無前  
二而有後一今欲遮遣彼所執義顯世第一  
法惟一念現前復次為令疑者得決定故謂  
先已說若心心所法為等無間入正性離生

是謂世第一法勿有生疑如心所法既有  
種心亦應然為令彼疑得決定故顯心所法  
雖有多種而心惟一由此因緣故作斯論世  
第一法當言一心多心耶答應言一心問如  
前已說未來修者亦得名為世第一法是則  
此法應有多心而言一心斯有何意答此中  
但說現在前者故言一心問今於此中何故  
不說未來修者答應說而不說者當知此義  
有餘此中復有多復次釋前已說故今不說  
之雖說一心而未釋義何故此法非多心耶  
非但有言義則可了答從此心心所法無間  
不起餘世間心惟起出世心世間心者謂有

漏墮有心即所遮止第二念等世第一法出世心者謂無漏斷有心即所引起苦法智忍相應之心若當起餘世間心者為劣為等為勝無有是處為分別故假設斯問劣等勝者對前刹那但有三故若當劣者應不能入正性離生何以故非以退道能入正性離生故謂非衰退萎悴墜落破壞之道能入正性離生要以勝進增盛勇猛堅固之道能入正性離生故若當等者亦不能入正性離生何以故先以此類道不能入正性離生故謂此初後品類相似如初刹那有障礙有留難無勢有故不能入正性離生後諸刹那亦應如是如

初刹那不能無間引起聖道後諸刹那亦應如是品類同故則應究竟不能證入正性離生如是應無解脫出離若當勝者先應非世第一法後方是世第一法以世第一法聲顯最勝等義故問先者既非世第一法爲是何法答是增上忍問何故見道惟勝加行無間引生於修道中引生聖道通劣等勝答以見道是未曾得道要多功用加行作意方能現前是故惟勝加行引起修道既是本曾得道不多功用加行作意而現在前故劣等勝皆能引起然世第一法與第一法爲因緣增上緣因緣者有三因謂相應因俱有因同類因

此是揔說若別說者過去與過去爲二因謂相應俱有與未來爲一因謂同類未來與未來爲二因謂相應俱有現在與現在爲二因謂相應俱有與未來爲一因謂同類增上緣者謂不礙生及惟不障

世第一法當言退不退耶乃至廣說問何故作此論答雖已說彼一心非多而未分別爲退不退今欲分別故作此論復次爲止他宗顯正義故謂或有執世第一法亦有退者爲止彼意顯示此法決定不退故作斯論世第一法當言退不退耶答應言不退雖有此說應更顯示不退因緣非但有言義便顯了何

故此法定不退耶荅世第一法隨順諦趣向  
諦臨入諦此彼中間無容得起不相似心令  
不得入聖諦現觀問云何名爲隨順諦趣向  
諦臨入諦耶有說此中現觀說名爲諦謂世  
第一法隨順現觀趣向現觀臨入現觀有說  
此中道諦說名爲諦謂世第一法隨順道諦  
趣向道諦臨入道諦有說此中見道說名爲  
諦謂世第一法隨順見道趣向見道臨入見  
道有說此中苦諦說名爲諦謂世第一法隨  
順苦諦趣向苦諦臨入苦諦有說此中苦法  
智忍名諦謂世第一法隨順苦法智忍趣向  
苦法智忍臨入苦法智忍然於此中隨順有



二一趣向隨順二臨入隨順世第一法於苦  
法智忍具二隨順爲等無間緣引生彼故此  
彼中間無容得起不相似心者謂此世第一  
法彼苦法智忍中間無容得起有漏墮有不  
相似心今不得入聖諦現觀者謂今苦法智  
忍不得現前問世第一法既有漏與無漏  
心可不相似何故乃說有漏墮有心名不相  
似無漏斷有心名相似耶答世第一法厭惡  
有漏趣向無漏故說有漏名不相似無漏名  
相似昔此向彼故猶如有人爲自親里之所  
苦惱依附他人以爲救護於自親里作他人  
想於他人處作親里想此亦如是復有說者

世第一法以與苦法智忍同辦一事謂捨異  
生性等故說有漏名不相似無漏名相似同  
辦一事故爲於前義乃至愚夫亦能解了故  
說現喻譬如壯士度河度谷度山度崖中間  
無能迴轉彼身還至本處或往餘處先所發  
起曾上身行未至所趣必不止息世第一法  
亦復如是隨順諦趣向諦臨入諦此彼中間  
無容得起不相似心令不得入聖諦現觀此  
中度河者謂從此岸往趣彼岸度谷者謂從  
此邊往趣彼邊度山者謂從此峯往趣彼峯  
度崖者謂從高趣下或如有人從屋脊墮未  
至地頃便起是心我當騰踴却還本處彼如

意不無如是事假使彼人或以神力或以呪  
術或以藥物還至本處可有是事然從世第  
一法未至苦法智忍中間能起不相似心令  
不得入聖諦現觀無有是處爲今此義轉得  
明了故今復舉第二現喻如瞻部洲有五大  
河一名殑伽二名閻母那三名薩洛瑜四名  
阿氏羅筏底五名莫醯如是五河隨順大海  
趣向大海臨入大海中間無能迴轉彼流還  
至本處或往餘處彼決定能流入大海世第一  
法亦復如是隨順諦趣向諦臨入諦彼此中  
間無容得起不相似心令不得入聖諦現觀  
問前喻今喻有何差別又前於義有何不盡

而更須說第二喻耶有說二喻於義無別欲  
令前喻所顯義理轉復增明故說今喻有說  
二喻亦有差別前喻爲遮不如理事後喻爲  
顯如理事故復次前以內分具足爲喻後以  
外分具足爲喻復次前喻爲止內分留難後  
喻爲止外分留難如五大河流入大海無能  
迴彼還至本處謂今還入無熱惱池無能轉  
彼往趣餘處謂使傍流或左或右前喻迴轉  
准此應知彼五大河未入海頃頗有能令不  
入海不無如是事假使有人或以神力或以  
呪術或以藥物今至本處可有是事然世第  
一法未至苦法智忍中間能起不相似心今

不得入聖諦現觀無有是處尊者造此發  
論時住在東方故引東方共所現見五河爲  
喻而實於此贍部洲中有四大河眷屬各四  
隨其方面流趣大海謂即於此贍部洲中有  
一大池名無熱惱初但從彼出四大河一名  
菟伽二名信度三名縛芻四名私多初菟伽  
河從池東面金象口出右繞池一帀流入東  
海次信度河從池南面銀牛口出右繞池一  
帀流入南海次縛芻河從河西面吠琉璃馬  
口出右繞池一帀流入西海後私多河從池  
北面頗脰迦師子口出右繞池一帀流入北  
海菟伽大河有四眷屬一名閻母那二名薩

洛瑜三名阿氏羅筏底四名莫醯信度大河  
有四眷屬一名毗跋奢二名藹羅筏底三名  
設坦荼盧四名毗坦娑多縛芻大河有四眷  
屬一名筏刺弩二名吠坦刺尼三名防奢四  
名屈惹婆私多大河有四眷屬一名薩梨二  
名避魔三名捺地四名電光如是且說有大  
名者然四大河一一各有五百眷屬并本合  
有二千四河隨其方面流趣大海如是所說  
二千四河未入海頃頗有能令不入海不無  
如是事假使有人或以神力或以呪術廣說  
乃至令不得入聖諦現觀無有是處  
復次世第一法與苦法智忍作等無間緣無

有一法速疾迴轉過於心者可於尔時能作  
障礙令不得入聖諦現觀是故此法決定不  
退此中復次難釋如前謂此前文但是方便  
開縱論道今所說者乃是根本遮奪論道故  
應言復次及如本文說此中意說世第一法  
與苦法智忍作等無間緣此正滅位取果與  
果彼苦法智忍次必現前若法與彼法爲等  
無間緣正滅位中取果與果若法若有情若  
呪術若藥物若佛若獨覺若到彼岸諸聲聞  
等能作障礙使第二念不現前者無有是處  
此中所言無有一法速疾迴轉過於心者應  
知即是苦法智忍相應之心此心必定速疾

現前無有餘法速疾迴轉過於此故如卍尊  
說苾芻當知我不見一法速疾迴轉猶如心  
者乃至廣說彼契經文如後定蓋當廣分別  
以佛說心速疾迴轉過餘法故卍第一法無  
間剎那苦法智忍必現在前是故此法決定  
不退

於此義中復有分別問何緣卍第一法定不  
退耶答加行廣大故安足堅牢故加行廣大  
者謂彼所習施戒聞思修所成善悉以迴向  
解脫涅槃心無所著施者即是莊嚴心施戒  
者即是別解脫戒聞所成者謂於聖教決擇  
文義思所成者謂不淨觀持息念念住三義



觀七處善修所成者謂煖頂下中忍安足堅  
牢者謂增上忍由世第一法加行廣大安足  
堅牢故定不退復次以此法後揔證三界見  
所斷斷非於三界見所斷斷有還退者是故  
不退復次以此法後揔證非非想地見  
所斷斷非於非想非非想地見所斷斷有還  
退者是故不退復次以此法後必起忍智非  
於忍智有還退者是故不退復次以此法後  
必起見道以爲重鎮決定無有退見道者是  
故不退問因論生論何緣見道定不退耶答  
以彼見道是速疾道無留難道非中起道是  
故不退復次以彼行者墮在見道大法駛流

爲流漂激無容可退其心慢緩方可退故如  
人墮在山谷暴流爲流所漂無得暫住行者  
亦亦是故不退復次退者多起煩惱現前住  
見道時無覆無記有漏善心尚不得起何況  
得起煩惱之心是故不退復次以住見道揔  
證三界見所斷斷非於三界見所斷斷有還  
退者是故不退復次以住見道揔證非想非  
非想地見所斷斷非於非想非非想地見所  
斷斷有還退者是故不退復次若從見道有  
還退者應見諦已還不見諦應得果已還不  
得果應現觀已還不現觀應入正性離生已  
還不入正性離生應成聖者已還作異生應

住定聚已還住不定聚勿有如是衆多過失  
是故見道決定不退有作是說以此善根惟  
一刹那無有能退半刹那者是故不退或有  
說者以此善根似無間道非住無間道可有  
退者是故不退復有說者以此善根是順勝  
分非住順勝分可有退者是故不退然有三  
種順決擇分一順退分二順住分三順勝分  
謂順退者名順退分若順住者名順住分順  
昇進者名順勝分煖具三種頂亦具三有說  
惟二除順住分以頂位是進退際故忍亦有  
二除順退分世第一法惟順勝分是故此位  
定無退理問此中三分一切皆是順決擇分

善根所攝與後定蘊所說四分有何差別答  
所依各異謂此但依隨順見道摠立一種順  
決擇分於中義別復開三種後定蘊中摠依  
有漏修所成善建立四分若順退者名順退  
分若順住者名順住分若順昇進者名順勝  
進分若順聖道者名順決擇分是故此彼所  
依各異

問頗有世第一法緣有所緣法耶緣無所緣  
法耶緣有所緣法亦緣無所緣法耶非緣有  
所緣法亦非緣無所緣法耶答有緣有所緣  
法者謂若世第一法緣心心所法緣無所緣  
法者謂若世第一法緣色心不相應行緣有

所緣法亦緣無所緣法者謂若世第一法緣  
心心所法及緣色心不相應行非緣有所緣  
法亦非緣無所緣法者謂隨心轉色及隨心  
轉心不相應行世第一法問頗有住一刹那  
頃當得緣有所緣法世第一法耶緣無所緣  
法世第一法耶緣有所緣法亦緣無所緣法  
世第一法耶非緣有所緣法亦非緣無所緣  
法世第一法耶答有謂住增上忍時當得如  
上所說四句世第一法問頗有住一刹那頃  
當得世第一法非彼所緣耶當得彼所緣非  
世第一法耶當得世第一法及彼所緣耶不  
當得世第一法及彼所緣耶答有住增上忍

時應作此四句且依未至定入正性離生者  
住增上忍時當得世第一法非彼所緣者謂  
未至定所攝世第一法中除緣當現在前所  
依世第一法諸緣所餘境世第一法當得彼  
所緣非世第一法者謂上五地所攝世第一  
法中緣當現在前所依世第一法當得世第  
一法及彼所緣者謂未至定所攝世第一法  
中緣當現在前所依世第一法不當得世第  
一法及彼所緣者謂上五地所攝世第一法  
中除緣當現在前所依世第一法諸緣所餘  
境世第一法如依未至定入正性離生者住  
增上忍時作此四句依上五地入正性離生

者住增上忍時應知亦尔問頗有成就世第一法不成就彼離繫得耶荅應作四句成就世第一法不成就彼離繫得者謂若依此地入正性離生彼未離此地染成就彼離繫得入正性離生彼未離此地染成就彼離繫得不成就世第一法者謂若依此地入正性離生彼命終生上地成就世第一法亦成就彼離繫得者謂若依此地入正性離生彼已離此地染不命終生上地不成就世第一法亦不成就彼離繫得者謂若未能入正性離生位有餘依彼有漏離繫得作如是言問頗有聖者成就世第一法不成就彼離繫得耶荅應作四句成就世第一法不成就彼離繫得

者謂若依此地入正性離生彼未離此地染  
成就彼離繫得不成就世第一法者謂若依  
此地入正性離生彼命終生次上地成就世  
第一法亦成就彼離繫得者謂若依此地入  
正性離生彼已離此地染不命終生上地不  
成就世第一法亦不成就彼離繫得者謂若  
依此地入正性離生彼命終超次上地生餘  
上地有餘依一切世第一法及彼一切離繫  
得作如是言問頗有成就世第一法不成就  
彼離繫得耶答應作四句第一句者謂若依  
未至定或初靜慮靜慮中間入正性離生彼  
未離初靜慮染第二句者謂若依此地入正



性離生彼命終生上地若未得世第一法生  
欲色界已離初靜慮染及生空無邊處第三  
句者謂若依此地入正性離生已離初靜慮  
染不命終生上地第四句者謂除前相

尊者此中七門分別世第一法謂初云何世  
第一法乃至第七世第一法當言退不退耶

於中前三門是根本論後四門是因生論世  
第一法由此七門分別顯示極爲明了

云何頂乃至廣說問先應說煖後方說頂如  
何於此先說頂耶荅如前已說此中逆說異  
生身中淨染諸法故先說頂後方說煖問若  
尔此中應先說忍何故於此起說頂耶荅先

已說忍而不彰顯謂先已說若當勝者先應  
非卅第一法後方是卅第一法先者是何謂  
增上忍旣已說忍故今說頂問尊者何故覆  
相說忍而不彰顯廣說忍耶荅亦應彰顯廣  
說忍相謂云何忍何故名忍忍當言何界繫  
及因生論皆應廣說而不說者有何意耶荅  
是作論者意欲尔故謂作論者隨自意欲或  
顯或隱或廣或略而作此論不應徵詰尊者  
此中彰顯廣說卅第一法隱略說忍於頂及  
煖顯略而說有餘師說若契經中顯了說者  
尊者於此彰顯而說忍於經中不顯了說是  
故於此覆相說之問豈不經中顯了說忍如

世尊說若有一類成就六法於現法中必不能得遠塵離垢於諸法中生淨法眼云何六法一不樂聞法二雖聞說法而不囑耳三雖囑耳聽而不安住奉行教心四於未證善法不懃求證五於已證善法不懃守護六不成就順忍應知白品與此相違忍於此經旣彰顯說尊者何故覆相說耶彼作是言經中雖說順忍而不說順諦忍故非顯說問順忍順諦忍有何差別義無異故應知前說爲善問因論生論何故此忍獨名順諦非煖頂耶答亦應說順諦煖順諦頂而不說者當知此是有餘之說義皆有故復次言順諦者謂極隨

順聖諦現觀忍極隨順聖諦現觀煖頂不介  
故偏說忍復次忍隣近見道煖頂不介故復  
次忍與見道相似煖頂不介故謂見道位惟  
法念住恒現在前忍位亦介煖頂不然謂彼  
初位雖但起法念住而增進位亦得起餘三  
念住故復次忍位必有不出意樂趣入聖道  
煖頂不介故復次修觀行者於忍位中樂別  
觀諦於頂位中樂別觀寶於煖位中樂別觀  
蓋故復次煖止緣諦下愚頂止緣諦中愚忍  
止緣諦上愚故復次煖止緣諦鹿愚頂止緣  
諦中愚忍止緣諦細愚故復次煖起緣諦下  
明頂起緣諦中明忍起緣諦上明故復次煖

起緣諦麁明頂起緣諦中明忍起緣諦細明  
故復次煖得緣諦下信頂得緣諦中信忍得  
緣諦上信故復次煖得緣諦麁信頂得緣諦  
中信忍得緣諦細信故復次以忍位中或時  
以十六行相觀察聖諦或時以十二行相觀  
察聖諦或時以八行相觀察聖諦或時以四  
行相觀察聖諦煖頂位中但以十六行相觀  
察聖諦故復次以忍位中無雜作意煖頂位  
中有雜作意故謂煖頂位數數復起欲界善  
心觀欲界苦為間雜已復能引此善根現前  
忍位不介復次以忍位中惟別作意別觀諸  
諦煖頂位中不如是故謂煖頂位雖別作意

別觀諸諦而於中間修摠行相摠觀諸諦謂  
觀一切有漏皆苦觀一切行皆是無常觀一  
切法皆空無我惟觀涅槃是真寂靜復次以  
忍位中有時相續有一刹那觀察聖諦煖頂  
位中惟有相續觀聖諦故復次以忍位中漸  
略觀諦極能隨順趣向涅槃如適他方以多  
賢少煖頂位中不如是故以如是等種種因  
緣忍名順諦煖頂不介問世第一法何故不  
立順諦名耶荅雖復此位一切皆勝而於四  
諦不徧觀察故不建立順諦之名  
問忍爲幾念住荅現在惟一雜緣法念住未  
來具四似見道故問忍爲幾緣荅爲四緣謂

因等無間所緣增上緣爲因緣者謂與彼相應俱有同類等法爲因緣爲等無間緣者謂與世第一法爲等無間緣爲所緣緣者謂與能緣此心心所法爲所緣緣爲增上緣者謂除自性與餘一切有爲法爲增上緣問忍有幾緣答有四緣有因緣者謂此相應俱有同類法有等無間緣者謂已生頂有所緣緣者謂四聖諦有增上緣者謂除自性餘一切法問忍當言何界繫答應言惟色界繫問忍當言有尋有伺無尋惟伺無尋無伺耶答應言三種問忍當言樂根相應喜根相應捨根相應耶答應言三根相應問忍當言一心多心

耶荅應言或多心或一心以增上忍一刹那  
故問忍當言退不退耶荅應言不退如是等  
義依上所說世第一法如理應知

問緣何諦忍後入正性離生耶有作是說緣  
道諦忍後入正性離生問若尔云何所緣行  
相不成倒錯若倒錯者云何不與入正性離  
生而作留難荅此於所緣行相雖有倒錯而  
於入正性離生不作留難所以者何已慣習  
故謂修行者於此慣習已成徑路自在現前  
如見道中緣欲界忍智後緣有頂忍智現在  
前緣有頂忍智後緣欲界忍智現在前緣苦  
諦行相後緣集諦行相現在前緣集諦行相



後緣滅諦行相現在前此等所緣行相雖有  
倒錯而於現觀不作留難已慣習故此忍亦  
尔若作是說緣道諦忍後入正性離生者則  
有三心同一所緣同一行相謂世第一法苦  
法智忍苦法智相應二心同一行相不同一  
所緣謂苦類智忍苦類智相應二心同一所  
緣不同一行相謂集法智忍集法智相應餘  
心不同一所緣不同一行相如是說者緣苦  
諦忍後入正性離生所以者何見道是無漏  
善根有大勢力雖所緣行相有倒錯而於現  
觀不作留難忍是有漏善根無大勢力若所  
緣行相有倒錯者則於入正性離生便作留

難故修行者忍位中所緣行相先廣後略由  
此得入正性離生謂彼先以四行相觀欲界  
苦次以四行相觀色無色界苦次以四行相  
觀欲界諸行因次以四行相觀色無色界諸  
行因次以四行相觀欲界諸行滅次以四行  
相觀色無色界諸行滅次以四行相觀欲界  
諸行道後以四行相觀色無色界諸行道齊  
此名下忍從此以後漸漸略之謂復以四行  
相先觀欲界苦次觀色無色界苦乃至最後  
觀欲界諸行道漸次略去色無色界諸行道  
復以四行相先觀欲界苦次觀色無色界苦  
乃至最後觀色無色界諸行滅漸次略去一

切諸行道復以四行相先觀欲界苦次觀色  
無色界苦乃至最後觀欲界諸行滅漸次略  
去色無色界諸行滅復以四行相先觀欲界  
苦次觀色無色界苦乃至最後觀色無色界  
諸行因漸次略去一切諸行滅復以四行相  
先觀欲界苦次志以色無色界苦後觀欲界諸  
行因漸次略去色無色界諸行因復以四行  
相先觀欲界苦後觀色無色界苦漸次略去  
一切諸行因復以四行相觀欲界苦漸次略  
去色無色界苦彼於欲界苦以四行相相續  
觀察復漸略之至一行相二刹那觀察如苦  
法智忍及苦智齊此名中忍彼復於欲界苦

一刹那觀察如苦法智忍此名上忍從此無  
間復一刹那觀欲界苦名世第一法從此無  
間生苦法智忍展轉乃至生道類智譬如  
有人欲從己國適於他國多有財產不能持去  
遂以易錢猶嫌其多復以易金猶嫌金重復  
以寶易大價寶珠持此寶珠隨意所往行者  
亦尔先廣觀察上下諸諦後漸略之乃至惟  
以一刹那心觀欲界苦次生世第一法次生  
苦法智忍展轉乃至生道類智若如是說緣  
苦諦忍後入正性離生則有四心同一所緣  
同一行相謂增上忍世第一法苦法智忍苦  
法智相應二心同一行相不同一所緣謂苦

類智忍苦類智相應二心同一所緣不同一行相謂集法智忍集法智相應餘心不同一所緣不同一行相問世第一法亦如忍有三品耶荅一相續中則無多相續中則有謂佛種性是上品獨覺種性是中品聲聞種性是下品依六種性三根說亦余

阿毗達磨大毗婆沙論卷第五

惻

萎悴 上烏為反 崖 魚皆反 屋楮 下正作 頃 傾領反

兢 其凌醯反 毗跋 下音跋 藹 於言反 啞茶 下上

達 反 筏 音代 刺弩 上郎達反 惹 田用反 駛 二使

漂激 上疋苗反 慢緩 下玄反 賀質 二同 非莫侯 反 下音

